

Dörfligeischer 1980

Salat isch gsund, so rüefe alli Pflanzefrässer,
Salat isch guet, das wüsse d' Pflanzefrässer besser,
Und drum serviere d' Tschugger üs vo früeh bis spat
Uf em Chrüzplatz täglech früscht Verchehrs-Salat !

Mir kenne e Ort, wo d' Bieler Jahre scho si am Dichte,
Doch das Dichte nützt dene Wichte grad mitnichte,
Das hei ou d' Bieler Regierigs-Narre müesse erfahre,
E Gymi-Bou isch doch nid guet zum Schiffli fahre !

D' Jura-Outoschilder, die berchöme Risse,
D' Jura-Outofahrer, die sy halt jetz bschisse,
Doch am Kanton Jura hett no viu meh gschadet,
Dass d' Regierig scho als Chinder z' heiss hett badet !

Dasch nid der Sherlock Holmes, wo do tuet detektiere,
Ou nid der Neeser, wo tuet Popo porträtiere,
Dasch sträng gheim - "top secret" – tüet dir das kapiere,
So tuet der Schwyzer Gheimdiensch z' Oestriich spioniere !

Der Bahnhofbuffet-Beizer hett e Bieridee gha,
Sis Porträt hei mir uf de Biertällerli gseh gha,
Drum chasch bi de nöchschte Wahle d' Etienne,
Als Pinup-Görl abdruckt uf Chäspapier erkenne !

Mir Schwyzer , mir si üsserscht schnäll im reagiere,
All's Nöie tüe mir Schwyzer üsserscht schnäll kapiere,
Doch führe mir wäg de Bärner d' Summerzyt nid y,
Denn bis die's merke, isch der Summer scho verby !

E chly e Schussfahrt düre Pulverschnee, e weiche,
E Sturz – e wyssi Wolche – der Gnägi bricht der Scheiche,
Los Rüedu, das hätt dir nid dörfe passiere,
Wo d' 14 Jahr bisch uf em Glattysch go träniere !

Übere Gmeinrat wird all Johr ar Fasnacht gsunge,
Immer wieder wärde Gmeinrat-Värsli brunge,
Ihr liebe Lüt, das sötti euch de gar nid störe,
Me tuet jo ds ganz Johr süsch gar nüt vo ihne ghöre !

Der Papscht, dä tuet ir ganze Wältgschicht voyagiere,
Als Katholike-Boss katholisch propagiere,
Drum chöi mir nid begriffe, dass jetzt d' Proteschtante
Ds Evangelium als Handcrème verquante !

Wenn du wottsch bim Möbu Jost es Näscht go choufe,
Chasch ds Gäld deheime lo, das Gschäft chunnt glych i ds loufe,
Nur ei Bedingig git's, wo si jetz tüe druf dringe :
Muesch e Sack voll Gras für d' Schlachthof-Chue mitbringe !